

Skul drop out iken kamap sampela man.

Lifestyle:

Long olgeta hap bilong kantri blong yumi Papua Niugini tude planti pikinini i lusim skul na stap nating long ples na taun. Sampela pikinini i lusim skul wantaim skul wok bilong ol na bikhet pasin, sampela pikinini igat hevi long skulfi papamama ino inap long pinisim haraip olsem skul i rausim ol. Sampela pikinini skul i longwe tumas long wakabout olsem pikinini ikam late na ino kamap oltaim long skul o skul I stap insait long bus tru na tisa I les long kain skul olsem na ol pikinini I nogat tisa long kisim sawe na planti pikinini I pinisim skul long gret 6, 8 na 10 tasol. Planti pikinini moa i nogat spes long skurim sawe igo moa na planti as bilong stap nating bihain long skul. Taim pikinini i kamap long kain mak olsem em i pilim em I lusman na em I tingim olsem skul na sawe ino go moa. Nau em tingting long painim isi laip long bihainim na amamas, tasol dispela rot blong painim isi laip em I ken taim na mekim yu kamap les man na meri wei bai oltaim yu tingting long narapela long helpim yu na yu bagarapim yu yet na igo insait long kain kain pasin nogut wei long tingting na skel blong yu igutpela. Tasol long luksawe blong narapela em inogut, olsem bai oltaim yu imas stap long poret long narapela, na planti ol kain kain hevi yu i bugim long sindaun bilong yu.

"Sanap long lek bilong yumi yet" o long tok englis ol I tok olsem **"Self Reliance"** Taim yumi tok olsem, wonem kain tingting yumi kisim o as tru tru bai I strongim dispela tingting blong sanap long yumi yet. Nogut yumi paol na ting ting long Gavman o wanpela kampani long kam na helpim yumi na kiliaiam dispela tingting blong sanap long lek blong yumi yet wantaim wanpela kain giaman developmen wantaim ol gutpela samting (resos) yumi gat, wei yu ken yusim long longpela taim na bihain ol pikinini inap yusim tu bai I pinis long wanpela taim tasol. Olsem na yumi noken pasim ai na wetim wanpela man long givim yumi tingting long managam resos blong yumi.

Sapos yu wanpela pikinini I lusim skul na kambek long ples yu wari long wanem! yu gat olgeta samting long giraun blong yu em I ken helpim yu sindaun isi, bus I pulap long kain kain samting wei yu no nidim moni long kisim nogat, **"Kalsa na kantri bilong yumi igat planti gutpela samting God papa i kamapim na givim long ol tumbuna bilong yumi ikam inap nau, em bai bilong yumi oltaim na em imas laip bilong yumi."**

Long ol pikinini ikamap bikpela long taun em tru tru olgeta samting em moni ya olsem em mas painim rot long stap laip long dispela kain hap, tasol mobeta yu sindaun isi na tingting, tumbuna talinga na tumbuna na papamama bilong mi igat ples o nogat?. Ol istap long taun tasol na mi kamap?. Mi igat ples o nogat?. Mi bilong kantri Papua Niugini o wanpela **"Waitman"** ikam hangamap long taun. Papua Niugini I ris long natural resos olsem na mobeta go bek long ples na yusim dispela sawe long helpim yu yet na kominiti.

Mi gat wanpela stori long yu skelim na bilong kirapim tingting tasol.

Wanpela boi nem bilong em'Yudan' em wankain olsem olgeta arapela pikinini long ples, raun raun nating, long bus go swim long nambis wantaim ol poro nambaut. Wanpela dei Pater bilong Lotu Katolik ikam raun long ples na lukim em na toksawe long papamama bilong Yudan olsem em I bikpela boi pinis na em mas go long skul. Long dispela taim em gat 8pela krismas samting, papa I amamas tru olsem pikinini bai igo long skul na kisim sawe, tasol mama I no laik em I wari long liklik Yudan bikos skul I longwe tumas, mama I tingim bikpela susa bilong Yudan (Gilami husait I pinis long gret 8 tasol nau I marit pinis) I sawe mekim, em I kirap long hap nait yet rapim ai tasol na kisim hap banana em I redim long nait ya long sit bilong paia, na igo long skul painim wara na waswas long rot na walkabaut igo kamap long skul na kambek long abinun tru. Yudan bai I wankain lusim mama na em wanpela bai igo long gaden na mekim ol narapela samting em yet. Dispela olgeta wari mama I tingim olsem na em ino amamas long Yudan igo long kain longwe skul.

Tasol papa I strong tru long Yudan imas igo long skul olsem na taim bilong statim skul I kamap nau em I kisim Yudan na tupela walkabaut igo kamap long skul na lukim het tisa bilong skul na kisim nem bilong em long wokim gret wan(1). Bihain long Ipela mun samting wanpela note het tisa blong skul I salim long papamama bilong Yudan long toksawe olsem klostu olgeta dispela taim ikam Yudan ino bin kamap gut long skul olsem skul I tingting long rausim em long skul o sopos papamama igat as long holim pikinini long ples. Yu sawe wonem! olgeta taim Yudan isawe tekof long moning na taim em I kam klostu long skul em I giamanim ol poro bilong em na sawe igo hait long bus istap na wetim ol arapela wanskul bilong em long ples, I pinis skul nau em I sawe igo joinim ol tasol na go bek wantaim ol long ples na papamama I ting em igo gut long skul na kambek, em wanpela trik Yudan I sawe wokim. Taim papa isawe long dispela orait, na em yet kamap long skul na toktok gut long tisa long wonem samting tru ibin kamap olsem na skul I lusim dispela tingting o givim sans long rausim em.

Long ples papa i paitim Yudan nogut tru na givim hatpela toktok long em na mekim em kilia long as bilong igo long skul. Tasol Yudan ino sawe harim tok, oltaim em isawe les long igo long skul na sampela taim em sawe raunawe na hait long bus, em sawe mekim wankain pasin klostu oltaim, nau tisa tu i luksawe long dispela pasin ino gutpela tumas olsem planti taim em imas kisim mekimsave (panis) long dispela kain bikhet pasin blong em, tasol long skul wok blong em wanpela gutpela smat mangi. Tasol sapos em i lusim dispela pasin bilong les ating em bai kamap wanpela nambawan sumatin tru long ol arapela.

Bihain long gret six (6) exam het tisa na BOD I toksawe olsem: Yudan I pas long igo long hai skul long wokim gret 7 man papa I amamas tru. Long ples turangu lapun papa bilong Yudan na ol lain famili bilong Yudan I hatwok tru long wokim kopra long baim skul bilong em. Long skul dispela taim Yudan i wok long kamap bikpela boi na tingting bilong em tu I wok long senis. Yudan igat planti ol prens wei planti I gat kainkain pasin na wei bilong ol. Yudan stat long simuk na lusim ol wok parada na ol klases tu. Wanpela taim long dispela taim Yudan i wokim 3rd yia bilong em (gret 9) long skul, wanpela bes pren bilong em i tokim em long lukim em bihain long nite stadi long haus gaden, orait haraip tru taim em lusim sampela homwok istap tasol na em i raun tasol long haus gaden long painim pren bilong em, taim tupela I bugim ol yet pren bilong em igivim em hap brus,

dispela em I dil wantaim ol mangi asples wei skul istap na ol I kisim ikam, orait Yudan na pren bilong em ino givim sans, tupela I mekim sawe long simuk na mekim pani na lap nambaut istap, ino long taim wanpela duti tisa I raun ikam na bugim tupela na kisim nem bilong tupela na tokim ol istap long panismen list.

Long Sarere taim ol arapela sumatin I malolo na mekim sampela privet wok bilong ol, turangu tupela poro I kisim taim long wok. Ino long taim nau dispela duti tisa I kambek long sekim tupela olsem tupela i wok gut o sanap nating tasol, orait em tokim ol long bihain long wok bai tupela imas lukim het tisa. Taim tupela I pinis wok tupela igo stret long opis blong het tisa. Taim em I harim olsem tupela simuk taim tupela stap long skul em ino amamas, na antap long dispela tupela I yangpela tumas long simuk, em givim ol strongpela warning (tok lukaut) long ol long ino ken simuk gen, na sapos ol I simuk na ol i bugim ol gen bai ol pinis olgeta long skul. Em givim tu sampela stia tok long stap gutpela sumatin long skul. Dispela em wanpela hap tok Yudan I sawe tingim oltaim, **"Hei yu luky bois long kam long haikul wei planti wanlain bilong yu inogat dispela sans, olsem na mekim gut. Yu gat longpela bright future tu, wonem samting yu wokim nau em bai ino wankain olsem 20 yias long nau, yu ken kamap sampela man olsem mi tisa"**. Long dispela taim ikam Yudan I wok long luksawe tu long sampela senis, ino long taim em I pinis long gret 10, em I no painim wanpela wok o igo long wanpela bikpela skul nogat, olsem na em I go stap nating long ples.

Long ples Yudan i amamas tru nau em bai mekim olgeta samting long laik bilong em ino wankain olsem long skul wei oltaim em i stap long lukaut bilong ol arapela. Yudan igo insait long kainkain pasin long ples na mekim samting long laik bilong em nogat gutpela as o (aim) long laip, em stap wankain olsem ol arapela mangi long ples. Em I joinim wanpela Spots grup na amamas raun na pilai long arapela ples. Tasol olgeta samting I wankain tasol nogat wanpela senis, bikhet I bikpela na raun long laik. Tupela papamama ino moa givim tok skul long Yudan bikos em bikpela boi pinis na sampela taim em I kros na I sawe laik paitim tupela olsem na tupela isawe pret na istap na lukluk tasol long em. Orait long dispela taim sampela wantok I lukim em na I stat long mekim kain kain toktok bilas long em. **[(Yudan) em i wanpela haikul sumatin husait i westim taim na mani bilong papamama na nau em raun olsem ol longlong man istap]**. Yudan i sem long harim ol kain kain ol toktok, tasol em bai mekim wonem nogat nau. Sans em sawe ikam wanpela taim tasol olsem na mekim gut.

Long wanpela nite em I driman na lukim em yet istap insait long wanpela bikpela grup tru .planti bilong ol em I no kilia long ol bikos ples insait long haus ino gat lait, olsem na em I wok long painim sampela wantok long askim ol em I stap wei, igo na em i lukim wanpela liklik lait tru ikam long hapsait windo, taim em igo lukluk ya em lukim olsem, igat sampela lain I toktok na lap long hapsait rum istap, na insait long dispela grup em I lukim pikinini bilong bikbrata (husait idai tupela yia igo pinis), em traim best long singaut tasol nogat em I kros nogut tru na taim em I laik kalap na holim windo tasol em abrus na pundaun na baksait em harim ol kain kain nois blong kraai na bilong ol wel abus. Yudan I guria nogut tru na em ikirap tasol em driman tasol.

Long dispela taim em I tingting planti na ino save em bai mekim wonem. Orait long wanpela taim em igo askim wanpela memba bilong lotu, (organisation blong Ligeion of Mary) long givim sampela gutpela tingting. Em nau ol I helpim em na long dispela taim

yet em I joinim dispela orgaisaisen, ol igo pre wantaim ol sikman, lidim ol Yuts long wokim sande Liturgy long haus lotu na planti ol kainkain activities long sios. Long dispela taim pasin na stap bilong em I senis olgeta, em I kamap wanpela gutpela boi tru long harim tok. Long dispela taim tu em stat long tingim bek long bikpela hatwok na ol gutpela tok skul papa na mama bilong em ibin givim em taim em mangi yet, na tu bikpela tru dispela hap tok het tisa I givim long hai skul deis bilong em, na isawe wari nogut tru na em bai mekim wonem nogat nau. Em isi isi long stat long luksawe na senisim olpela pasin bilong em na stap isi harim toktok long tupela papamama bilong em.

Wanpela man long ples bilong em I lukim na skelim olgeta pasin na stap bilong Yudan ikam I senis olgeta, na em I amamas tru olsem em yet laik traim long helpim em, long givim em advise long traim painim sampela rot long skurim sawe bilong em. Long wanpela taim em kisim Yudan wantaim olgeta skul pepa na refrens bilong em wantaim bilong ol bikman long ples na sios long helpim em long painim wok. Taim ol bikman I lukim olgeta dispela pepa wantaim entri tes em I wokim, em I gat gutpela ripot tru na ol I makim em long kisim moa trening, bihain long tupela mun samting. Yudan I kisim wanpela pas long kamap long interview na ol I tokim olsem em I pas long lgo long skul polis , man Yudan I amamas tru. Nau em stap long polis kolis na tingting long skul hat moa na kamap olsem wanpela speselist bilong CID seksen. (stori ikam olsem tasol)

Yudan I tingim igo bek long olgeta hatwok na traim em I bugim long laip em I no isi long stap long dispela ples giraun wantaim ol kainkain senis ikam insait long Gavman, Sios, Kampani na yumi wanwan. Olsem na Yumi mas givim taim bilong yumi wanwan tu long **luksawe long yumi yet na imas igat aim/goals** long kisim, olsem bai yumi sanap strong long resis igo long mak, bikpela ting ting Yudan laik serim dispela tingting long olgeta pikinini I pinisim skul long wanem rot yu mas sawe olsem, laip ino stop long hia tasol nogat, mekim yu yet kamap ples kilia wantaim sawe na resos stap klostu long yu. "Yu mas igat taim sampela taim tu long tingim husait tru I wokim olgeta samting na man olsem piksa bilong em yet long dispela ples giraun, bai em iken helpim yu wantaim planti gutpela blesing bilong em." Yudan I tok.

Markus Manumbor i raitim: Parataxonomist Training Center P O Box 604 Madang Ph/fax:8521587 binatangi@datec.com.pg